

## FAULA VII.

## LE PECORE E I PASTOUR.

**A** j'era sna montagna un bon Pastour,  
 'L qual avia rimess tute soe Feje  
 Ant j' unge d' un birbant so servitour;  
 Stossì non pà d' nutrije e d' pastureje,  
 A l' era neuit-e-dì tavota an tren  
 A picje 'l lait, e 'l bur, e tosoneje;  
 Un dì li vist-e-pris, senza dì nen,  
 Mentre i mouton, 'l troupe l'era ant la stala,  
 Tut sol, zichin-zichet, 'l padron ven.  
 Le pecore dla goi ai sauto an spala,  
 Sclamand tute d' acord.... ah seve-sì!  
 E chiel a j' ha rispost: e bin com' vala?  
 Va mal, com' a peul nen andelo d' pì;  
 I soma-sì ridote ale bsognette  
 Senza podei crié, fesse senti;  
 A j' è coul vost garsson, pr vagnè d' psette,  
 Ch' a n'buta tute quante ai isiboè,  
 Gavandne se a podeiss fin le grassette.

Disend loll , j' ariva sto grivouè ,  
E l'autr s' j' è vira antourn , e ai dis : com'ela?  
Cos' elo sto trafili sur Fransouè ?  
Sapia , chi n' hai già piena la scudela !  
E 'l lait , le toume-grasse , 'l bur , j' agnei ,  
La lana ch' t' has robà..... porco , dov' ela ?  
Scoutè , me car padron , venta savei ,  
Che si tutt a l' intourn pr ste boscaje  
I Luv a son pì spess quasi ch' j' ousei ;  
E i dnè ch' j' hai guadagnà , j' hai impiegaje  
A feje dè la cassa dai paisan ;  
E voi peule pensè ch' j' abbia robaje ?  
Na pecora ai rispond..... oh che bagian !  
Prchè scortiene tant pr dè la cassa  
Ai Luv , ch' j' ouma nen vist nè noi nè i Can ?  
Pr coula-lì , me car , a lè trop grassa :  
L' è na rason tacà mach con d' spuv ,  
L' è voi ch' i sè farsive la pansassa ;  
L' è voi ch' n' avì rusià , son nen i Luv !

---